
ЯХШИЛИКНИНГ МУКОФОТИ - ФАҚАТ ЯХШИЛИКДИР

Бугун дунё бўйлаб тарқалган коронавирус пандемияси инсониятни синондан ўтказмоқда. Бу воқелик бизни ҳам четлаб ўтмади, албатта. Шундай даврда мардлик ва жасорат намунасини кўрсатаётган меҳнаткаш ва саҳоватпеша юртдошларимиз борлигидан фахрлансак арзийди.

Хабарингиз бор, Президентимиз ташаббуслари билан жорий йилнинг 26 май куни “Меҳр-саҳоват” кўкрак нишони таъсис этилганди.

Жамиятда тинчлик-осойишталик, дўстлик ва тотувлик муҳитини мустаҳкамлашда фаол иштирок этаётган соғлиқни сақлаш соҳасининг жонкуяр вакиллари, саҳоватли тадбиркорлар, давлат ва жамоат ташкилотларининг фидойи ходимлари ва бир қатор ташаббускор, фаол фуқароларни “Меҳр-саҳоват” кўкрак нишони билан мукофотлаш ҳақида ҳукуматимизнинг Қарори қабул қилинди.

Қувонарлиси, тақдирланганлар орасида 481 нафар фарғоналикларнинг борлигидир.

Бугун вилоят ҳоқими Хайрулло Бозаров иштирокида ўтказилган анжуманда вилоятда тинчлик-осойишталик, бирлик ва ҳамжиҳатлик муҳитини мустаҳкамлашда, беғараз ҳомийлик ва эзгу ишлари билан эл - юрт ўртасида ўрнак бўлаётган бир гуруҳ юртдошларимизга кўкрак нишони ва гувоҳномаси топширилди.

Гулчеҳра Исмоилова, вилоят юқумли касалликлар шифохонаси бош ҳамшираси: - Мен бугун бахтиёрман. Президентимизнинг эътирофига, халқимизнинг ҳурматига сазовор бўлиш қалбим тубидаги эзгу тилагим эди. Ҳаммаси учун раҳматимни ҳалол ва садоқатли меҳнатим билан оқлашга ваъда бераман.

Бахтиёр Валломов, “Файз Бинокор Олтиариқ” хусусий корхонаси раҳбари: - Юрт, эл бошига камарбаста бўлиш халқимизнинг қонида, виждонида бор. Халқимизнинг ҳаёти фаровон бўлсин, осойишта кунлар тезроқ келсин. Кўкрак нишони билан тақдирланганлар сафида бўлганимдан жуда хурсандман.

Анжуман сўнгида вилоят ҳоқими сўз олиб, юксак эҳтиром билан таъсис этилган мукофотнинг илк эгаларини яна бирбор табриклаб, яхшиликнинг мукофоти - фақат яхшиликдир, меҳнатингиз, фидойилигингиз ҳар доим эъзозланадиган юртда эканлигини айтиб ўтмоқчиман, деди.

Фарғона вилояти ҳоқимлиги

Facebook, Telegram, Веб сайт, YouTube

2020-10-03 16:07:54